



## 切膚之愛

十九世紀的英國，派傳教士到逐所在行醫傳教，宣揚現代文明，咱臺灣嘛有受著個真大、真好的影響。

1895 年，醫科畢業生蘭大衛先生，來到臺灣的彰化行醫宣教，因為西醫比漢醫較進步，個閣有基督徒疼惜艱苦人的心胸，真緊就受著彰化人的尊敬，後來煞有「南門媽祖宮，西門蘭醫生」的名言傳出來，予伊恰媽祖平坐倚，可見伊是佬爾仔受人敬重的。

1912 年，蘭醫生恰宣教師連瑪玉結婚。結婚了後，先生娘連瑪玉就開始學護理工課，管理醫生館的內外。佇 1928 年，一个十三歲的囡仔周金耀，因為腿頭的膿袂收束，愛接受「皮膚移植」的手術，先生娘就自願奉獻，將家己的皮膚徙栽去這個囡仔的空喙頂，將「切膚之疼」化做「切膚之愛」。這款的高貴情操(tsîng-tshò)，是毋是來到佛陀「割肉飼鷹」的境界咧？

個翁仔某 1936 年退休，佇彰化行醫四十一年，將事工恰榮耀留跡臺灣，轉去英國，用英國政府的退休金過簡單的生活。蘭醫生佇 1957 年過身，醫生娘佇 1984 年過身，攏是老長壽。蘭醫生行醫宣教的事工，攏予個後生蘭大弼，恰新婦高仁愛承續落來。

觀看個翁仔某的一生，攏是奉獻佇臺灣，予臺灣會當早日行入現代。除了蘭醫生的行醫濟世，醫生媽嘛獻出「切膚之愛」，閣留三本冊落來，記錄臺灣的種種代誌，予咱會當了解百年來臺灣人的生活查滴，全款是予人欽敬。

頂日仔去看蔡瑞月舞蹈社演出的現代劇——切膚之愛，戲內講臺語的攏是好人，予我看著心涼脾土開。閣較歡喜的是個後生欲過氣進前的一句話，嘛是臺語：「愛疼惜艱苦人。」我想，伊若活到今仔日，應該會是「愛疼惜艱苦的臺語人」。

作者：邱文錫

### ☆詞彙學習☆

【平坐倚】pên-tsê-khiā：平起平坐。

【老長壽】lāu-tiāng-siū：人瑞。

【腿頭膿】thuī-thâu-lâng：腿部潰爛膿腫。

【承續】sîng-siòk：繼承。

【收束】siu-sok：傷口或潰爛處的收口痊癒。

【心涼脾土開】sim liàng pí-thóo khai：心花怒放。

【徙栽】suá-tsai：移植。

【事工】sū-kang：志業，為教會用語。

【過氣】kuè-khui：斷氣。